


Richard Tromp, gerente di MFA Noord:

Facilidad Multifuncional kier habri di mainta te anochi pa sirbi un y tur




ORANJESTAD(AAN): Di aranson ultimo documentonan a keda firma pa duna inicio na construccion di e prome Facilidad Multifuncional cu lo ta esun den bario di Noord. MFAnan ta e concepto nobo cu Gabinete Mike Eman ta introduci pa reemplasa y mehora loke anteriormente tabata conoce den pueblo como e Hulpbestuurskantoor.

Cada un di e MFA tin su mesun gerente y den e caso di Noord, esey ta Richard Tromp. Sr. Tromp a bin back for di Hulanda y hunto cune el a trece e experiencia valioso di a traha den un MFA den e gemeente di Rotterdam. E ta indica cu na Aruba, mescos cu na Hulanda, e ciudadano simplemente kier tin un bon calidad di bida den su bario caminda su yiu-nan ta sigur riba caya.

MFA lo aporta na e meta ey door di bira un punto di encuentro pa e comunidad y ofrece espacionan caminda gruponan por traha na beneficio di pueblo y ciudadanonan por desaroya

nan interesnan educativo y recreativo. “Nos a puntra nan kico un MFA por yuda nan cune. Nos a bin hunto y nos realisa cu nan ideanan ta mescos cu loke nos tabatin planea,” Sr. Tromp a bisa di e reunionnan cu ya pa algun tempo ta sosteniendo cu hoben, mayor y grandinan den bario di Noord. Tambe nan ta sinta cu e diferente gruponan social, fundacion y boluntarianan activo. E idea ta tras di esaki ta pa traha un Mapa Social di e distrito.

“Pa nos por haci un bon tarea nos mester tin un bista completo di e bario. Ken ta den e bario, e personanan clave, e gruponan, e fundacionnan, pero tambe e boluntarianan cu ta haci cosnan fo’i bista. Si nos tin un bista di esey nos por puntra nan kico nan mester pa yuda nan y conhuntamente traha pa e bario di Noord,” Sr. Tromp a splica añadiendo cu esey ta e tarea principal cu nan ta haciendo. “Hopi bario tin grupo di hendenan cu ta bin hunto cu no ta registra of organiza, e personanan ey tambe nos kier acerca.” nan kier wak kico ta worde haci y si tin un grupo cu por traha bon cu y otro y asina trece nan hunto pa duna nan un man caminda mester y maximalisa e bon cu ta haci pa e bario. back na Hulanda, e ta recorda con parti di e trabao tabata pa acerca hende den bario y puntra nan kico por crea pa haci e bario mas bunita y hisa e nivel di bida. Hopi biaha e deseo di e ciudadano ta pa un bario mas limpi, cu palo cu sombra y



ora cu tin bon tempo, por sali papia cu otro y conoce bo bisiña.

“Ora bo conoce ken ta biba den bo caya, e ta bira mas safe paso bo sa cu bo yiu-nan por bay riba caya. Ora algo pasa, bo sa unda pa bay. Esey ta algo cu por pasa aki tambe na Aruba.” Sr. Tromp kier implementa su conocimiento y experiencia di Hulanda na Aruba, pero cu e ideanan di e hendenan di e bario mes. “Aki tambe tin hopi hende cu hopi bon idea. Conhuntamente nos por ta un bon cos pa comunidad di Aruba; den e caso aki pa comunidad di Noord. Hopi di nos tin bon ideanan y hunto e ta bira hopi mas miho paso bo ta crea algo cu ta pas cu e comunidad caminda bo ta biba.” Pa loke ta e servi-

cio mes na MFA, e edificio mester traha di un manera mas eficiente, mas proactivo y semper na servicio di e ciudadano.

“E ciudadanonan kier bay na un loket y haya un bon servicio. Si ta un formulario mester, e mester por haya esaki y netjes; si no tin; ta busca un solucion sea pa bisa ki dia ta bin back of laga e hay’e na su cas. Awendia tur cos ta digital y por mand’e via email tambe. Cambia e manera di servicio, e no mester keda tradicional,” Sr. Tromp a duna di conoce. Ta bay cuminsa cu dos persona, e hunto cu Chris Figaroa.

Den futuro ta wak si mester bin mas persona. Tambe lo tin tur e trahadonan di e Hulpbestuurskantoor na Noord. “Ta bay drecha e

servicio pa medio di entrenamiento y actualisacion y ta pensando riba un orario di 7’or y mey di mainta pa 9’or di anochi. “Tin serviccionan cu lo worde duna den dia, pero si kier pa hoben-nan y adultonan uza e facilidadnan di MFA den oranan liber, mester ta accesibel te mas laat atardi. “Dor cu ta pensando di cambia e orario, esey ta nifica tambe cu e pensamiento di trahadonan di gobierno pa traha mas laat cu 4:30 of 5:00 ta bay pasa den un cambio di mentalidad y nos ta purba introduci esey pa nos,” tabata e palabra di Sr. Tromp. Nan mester wak ainda con esey lo funciona y introduci e cambio na mas departamento. “Si nos cuminsa na chikito e por bira algo mas grandi.”